

Bunz Songzmoeg Baengzdoj Raeujrub

温暖的土布被套

□ Vangz Haijyen / 黄海燕

Baihnamz bineix seizdoeng gangj daengz couh daengz lo. Ngoenzlwenz nyaengz daenj mehmuh gen duenh roxnaeuz daenj mehvinj mbinfifi, cij raq rumz liengz ci gvaqdaeu, caiq raq fwn ndeu doek roengzdaeu, gij heiqrndat lumj baez yaepda nei couh mbouj miz ngaueuz lo. Hai cueng, gij rumz ci hauej gwnznaj daeu, daengx ndang couh liengz ndaej hwnj naenggaeq bae, banhaemh hauej mbonq ninz couh aeu goemq bunz moeg na'noeknoek. Gou lumj bi gax-gonq nei, cungj gyaenz dawz bunz songzmoeg baengzdoj hauej mienzdoi daeu goemq.

Bouxgvan gou hainduj mbouj nyienh goemq bunz songzmoeg baengzdoj. De gangj naeuz: "Maz seizdaih lo, bouxlawz lij yungh songzmoeg baengzdoj dem?" "Mwngz loek le, gyoengq vunz seizdaih neix gvai lai lo, ndang daenj roxnaeuz gwnz mbonq goemq, cungj gyaenz yungh baengzdoj lai, aenvih baengzdoj mbouj caengq ndangnoh." Gou han de naeuz. "Gij baengzdoj bouxwnq dwg lumj neix nyapnyotnyot ha?" "Bunz neix dwg daxbuz gou aeu cien fanh geu cim mae daemj okdaeu, mwngz miz ngaenz cien ngaenz fanh lij cawx mbouj ndaej dem."

Daxbuz ciuh vunz dwgrengz lai. Daxgoeng ndaej samcib roek bi couh biek daxbuz bae le, gvenggvak sam daeglwg caeuq dahlwg ndeu hawj daxbuz. Seizde ngaiz mbouj gaeuq gwn, mizeiz cij ndaej gwn mbawfaex roxnaeuz ragfaex. Daxbuz bouxdog gwn haemzhoj ciengx geij boux lwg. Vunzmbanj gangj daengz daxbuz gou cungj haenh de.

Buenq lai ciuh vunz gvaqbae, daxbuz yawjraen gyoengq lwglan rim ranz, faj naj de ngoenzngoenz hai baenz va. De ciengzseiz gangj: "Sou gyoengq lwglan gvaq ndaej ndei, gou couh mbouj miz maz simnyap lo."

Daxbuz ndangdaej lij ndei seiz, bibi youq ndawreih ndaem gofaiq. Daengz seizcou, ngoenz mbwn-gvengq, gij faiqen lumj baj fwjhaui nei youq ndawreih dek ndaej hausaksak,

daxbuz couh daiq dou gyoengqnyez dawz daeh dawz loz bae gip faiq, gaiq reih doek gaiq reih gip gvaqbae, daxbuz doq gip doq eu fwen:

"It naed haeux dwg it caek hanh, Haeuxgwn ndawranz mbouj gag daeu,

Mbaet gwn mbaet yungh geiq simdaeu,

Ranz raeuz hwngruengh cienz baengh de."

Daxbuz eu, dou hix riengz de eu, de eu coenz dou riengz coenz, gwnzbya ndawlueg couh lumj doxbeij eu fwen nei, nauhyied lailai.

Daxbuz aeu faiq daeu dak ndit, caj daengz gij faiq mboengmbupmbup hwnjdaeu, canghdajmienz hix daeu daengz lajmbanj lo. Seizde, lajmbanj mbouj doeng ci, siengj bae haw saek mbat couh aeu byaij bae, sojmiz gijgwn gijyungh aeu mbaq rap bae ranz. Boux guh seng'eiq lumj canghdajmienz, canghguhdoz, boux-gairek cungj louz mbanj gaicawx. Canghdajmienz bang daxbuz daj baenz faiqgung, de aeu mbanj daj baenz mienzdoi, mbanj daz baenz mae. Daxbuz ciengzseiz gyanghaemh youq laj daeng'youz daz faiq, gij sing daz faiq lumj go coi ninz nei, buenx dou hauej ninz.

Daxbuz daz mae heux youq aen lwgfaiq, heux baez aen doek aen, heux liux le, aeu aen fangzci fwngz ngauz de daeu hai mae, hai baez hauilai gyoengx, gyoengxgyoengx miz cien fanh diuz mae. Ra ngoenz mbwn-gvengq ndeu, dawz naed haeuxyangz daeu dumq cug dumq dek, caiq coq gij mae gyoengx roengzbae doengzcae dumq. Vihmaz aeu naed haeuxyangz dumq mae? Daengz ngoenzneix gou hix mbouj rox, seizde hix mbouj geiqndaej cam daxbuz gvaq. Hoij gij mae dumq gvaq youq gwnz gaqcuk dak ndit, byaij gvaq henz lij nyouq ndaej gij heiqrndat naed haeuxyangz dem.

Daxbuz aeu geu faexcuk iq ndeu dub gij mae neix, caj daengz bomj haeuxyangz doek liux, gij mae neix hix sau lo. Gij mae neix buenq ndeu

cimq hauej ndawraemx gofog, nyumx baenz mae ndaem, buenq ndeu mbouj hwnj saek, neix couhdwg mae hau.

Nyumx mae ndei, couh daemj baengz lo. Daemj rok gaxgonq, aeu hoij rok. Hoij rok aeu miz song boux vunz, boux ndeu aeu mae, saekhau caeuq saekndaem doxgek, ndaw uk de lumj miz fuk veh ndeu nei, aen gek lawz dwg saek lawz, aen gek dem aen gek miz geijlai gvengq, de cungj rox caez, baez aeu loek, dozanq couh bienq lo, gij baengz daemj okdaeu couh mbouj gyaundeit lo. Ndigah, boux aeu mae itdingh dwg boux cangh'aemae. Lingh boux aeu yawj mae, doxheux couh hai, goeng le couh cieq. Song boux vunz siuj boux lawz cungj guh mbouj baenz hong.

Seizde, ranz dou mbouj yungh cingj vunz daeu bang, daxmeh gou caeuq daxbuz songde couh rox guh. Hoij rok seiz, youq doulaeng baiz geij aen gyaek, dounaj baij aen rok, daxmeh gou song fwngz cou mae byaij daengz dounaj youh byaij daengz doulaeng, baebae dauqdauq, ca mbouj lai guh baenz ngoenz cij guh ndaej liux. Miz geij lwgnyez cabheiq yawjraen daxmeh byaij hauej byaij ok, couh diuq hauej gyang bae, gauj ndaej gij mae miz giz goengq, miz giz doxgeuj, hawj daxmeh hozhwnj ndaej yaek hut yaek dub.

Hoij rok le couh daengz daemj rok lo. Daxbuz geq le ndangdaej mbouj daih ndei, mbouj bae guh hongreih hongnaz lo, couh guh

hongranz, cawj ngaiz ciengx gaeq gueng mou, guh gij hong neix liux, de couh daemj baengz. Aen lwgdaeuq youq ndaw fwngz de lumj duzbya youz raemx nei cin gvaq ndawmae, daj baihgvaiz cin daengz baihsuix, youh daj baihsuix cin daengz baihgvaiz, baebae dauqdauq, nyinhcaen dangq-maz.

Mbouj geij nanz, bunz songzmoeg baengzdoj couh daemj baenz lo.

Bi dem bi, daxbuz bibi daemj baengz. Ndawranz gak boux lwglan dou cungj miz songzmoeg daxbuz daemj. Dou naeuz de wngdang yietnaiq lo, bouxlawz rox de mbouj daengx din fwngz, ciuqgaeuq bibi ndaem faiq, bibi daemj songzmoeg. Dou cam de: "Buz ha, ndawranz bouxbou miz gij songzmoeg mwngz daemj lo, mwngz daemj hawj bouxlawz dem?" Daxbuz riunyumnyum naeuz: "Lansau ha, daxbuz ngoenz beij ngoenz geq lo, ngoenzlawz dai bae couh mbouj ndaej raen sou baehaq, seizneix da lij yawj raen, lai daemj geij bunz hawj sou."

Daengz ngoenzneix, gij baengz lai cungj lai yiengh guh baenz songzmoeg, seiznit goemq cungj, seizhah goemq lingh cungj, hoeng, gou itcig gyaenz goemq bunz songzmoeg baengzdoj daxbuz daemj.

Daxbuz dai bae cib geij bi lo, baez ndaej lumh bunz songzmoeg baengzdoj neix, couh lumj ndaej gaemh gij fwngz daxbuz nei, ndawsim raeujrub.



Doenghnaz sifan Gvanyangz Yen Vangzgvanh Cin.

·Sawcuenhraz Lwgnyez·

Gij Golwgnyez Henz Dahhoengz

红水谣

□ Lanz Haijyangz Moz Beibei / 蓝海洋 莫蓓蓓

Gou doenghngauz lo, hoeng, gou cungj roxnyinh Aulungzveiz dwg boizhaemz, danghnaeuz dwg bouxwnq, bihaenx daj ndawlauz ndaej cuengq dauq seiz, gangj mbouj dingh couh deng meh dai ranz sanq gik ndaej dawz fagcax bae ranz Ahveij gaj geij boux vunz okheiq bw.

Daiq aiq hix roxnyinh gou caengz saenq caez, ciepdwk youh bouj gangj:

"Doeklaeng, vunzmbanj ciengz-seiz raen de buet coh gwnzbya, mizeiz baez bae song sam ngoenz cij dauq, caezgya cungj naeuz de caeuq bang caeggeq gwnzbya vanzlij miz lenzloz,

mboujnex de ciengz hwnj bya bae guh maz?"

"O?" Neix dwg gij saeh youq-gaenj lo, Aulungzveiz nanzdauh caen dwg caeggeq? Yienghneix, gij goj de lwnh hawj gou caen yaeh vunz

dahraix lo.

"Mbouj saenq yaep he cam bohgox mwngz bae, bohgox mwngz danghnaeuz mbouj dwg baujjang, gou baenzlawz cungj mbouj hawj de bae guenj doenghij saeh neix, hoeng

caezgya nyengh senj de guh. Ai! Gou caen lau gij saedceij simnyap couh youq gaenlaeng ne, bouxhak seizonj guh vei luenh hoj dang, doenghij bi neix……"

(caengz sat)